

每週經課朗誦經文(巴克禮台語漢字)2012/12/09

共同經課 - 1 瑪拉基書三章一節~四節

1 萬軍的耶和華講：「看啊，我差我的使者，伊欲佇我的頭前備辦路。佢所尋的主欲忽然到伊的殿；盟約的使者，就是佢所欣慕者，看啊，伊來啦。」2 獨獨伊來的日，是誰當會起？伊顯現的時，是誰倚會住？因為伊親像鍛煉者的火，閣親像漂布者的鹼。3 伊欲坐啲，親像鍛煉銀互伊清氣的，來清氣利未的子孫，鍛煉in親像金銀；in就欲憑公義獻禮物互耶和華。4 彼時，猶大及耶路撒冷所獻的禮物欲得著耶和華歡喜，親像舊時的日、古早的年。

共同經課 - 2 路加福音一章六十八節~七十九節

68 著謳啫主——以色列的上帝！因為伊有看顧伊的百姓，來贖回伊，69 替咱興起拯救的角，佇伊的奴僕大衛的家，70 照伊對有世間以來用伊聖的先知的嘴所講的，71 就是救咱脫離對敵，及見若怨恨咱的人的手，72 來行憐憫佇咱的列祖，來紀念伊聖的約——73 就是及咱的祖亞伯拉罕所咒的誓——74 互咱已經脫離諸個對敵的手，75 一世人佇伊的面前，用聖、用義無驚來服事伊。76 嬰仔啊！你也欲稱做至高者的先知；因為你欲行佇主的面前，來備辦伊的路，77 互伊的百姓對得著赦罪，就知拯救的恩。78 為著咱的上帝憐憫的心，對按呢互早起時的日對頂面來到佇咱，79 來照許個坐佇黑暗及死蔭中的人，導咱的腳入平安的路。

共同經課 - 3 腓立比書一章三節~十一節

3 我見有數念佢，就感謝我的上帝；4 逐擺為著佢眾人祈禱的時，常常歡喜來祈禱。5 因為佢對頭一日到今，相及有份佇興起福音。6 我也深信起頭做好的工佇佢的，欲成伊，到佇耶穌基督的日。7 閣我為著佢眾人有此號心志是合宜；因為佢常常佇我的心內，無論我佇鐵鍊中，以及辯明來堅固福音的時，佢眾人及我有份佇恩典。8 因為上帝給我做干證，我體基督耶穌的心，有怎樣戀慕佢眾人。9 閣我所求的，就是互佢的仁愛佇智慧以及逐樣的曉悟，充滿又閣充滿，10 致到佢會驗出許個卡好的事，互佢純全無塞礙，到佇基督的日；11 用義的果子滿滿就是對耶穌基督有的，欲互上帝得著榮光謳啫。

共同經課 - 4 路加福音三章一節~六節

1 提庇留該撒坐位的十五年，本丟彼拉多做猶太的總督，希律做加利利分封的人君，伊的兄弟腓力做以土利亞及特拉可尼地方分封的人君，呂撒聶做亞比利尼分封的人君，2 亞那及該亞法做祭司頭的時，撒迦利亞的子約翰佇曠野裡，上帝的話到佇伊。3 伊就到約但河的四方，傳反悔的洗禮，互人得著赦罪。4 親像先知以賽亞冊裡所記的話，講：有啲叫佇曠野的，伊的聲講：備辦主的路，修直伊的小路！5 諸個山谷攏欲填淀；諸個大小的山頭攏欲互伊低！彎曲的欲互伊直；崕碯的欲互伊平！
3:6 凡有肉體的欲看見上帝的拯救！